

Abogado mr. C. Lejuez ta señala un sorto di set up pa perhudica su cliente

E mama a presiona e mucha pa bisa cu pastoor a haci actonan immoral cun'e

ORANJESTAD – Ayera mainta den Corte a trata e caso penal cu Ministerio Publico a cuminsa contra un pastoor di San Nicolas, kende ta wordo acusa cu na Juni 2011 a haci actonan immoral cu un mucha muhe di 11 año. Bon Dia Aruba tabata presente den sala di Corte y teniendo cuenta cu ta un caso interesante, ta publica e punto di bista di e abogado di e pastoor separa cu e exigencia y tratamiento di e caso. Den e articulo aki ta publica kico e abogado di e pastoor, mr. C. Lejuez a trece padilanti den Corte.

MAMA A PRESIONA YIU PA DECLARA

Abogado mr. Lejuez a cuestiona e hecho cu e prome interrogacion di e mucha, no a wordo graba bon y no tin un proces-verbaal riba esaki.

E ta haya importante pa determinar con a yega na e declaracionnan. E ta lamenta cu no tin e prome interrogacion riba papel pasobra e sistema di grabacion a dañá.

Na opinion di e abogado, e mama di e victima ta bisa cu e pastoor a bay busca e mucha pa haya les di piano. Segun e abogado, e mama a declara na Polis cu e no a ripara nada straño na e mucha. Despues e mama mes ta bisa cu durante combersacion cu e pastoor encunto biaha pa Curaçao, el a ripara algo y tabata puntra su yiu diferente biaha si el a wordo molestia pa e pastoor. E mama tambe a bisa cu e pastoor a bis'e cu el a haya permiso di e mucha (11) pa mishi cu su pechonan. E mama a bisa cu el a keda sorprendi cu esaki. Mr. Lejuez a bisa Hues cu e ta haya straño cu e mama no a haci nada.

Tambe e mama a declara cu el a yama su yiu cu tabata na e pastoor y e mucha a bis'e cu e pastoor tabata drumi. Despues e mama a bolbe puntra e mucha si el a wordo molestia door di e pastoor. E ora ey e mucha a keda keto un rato y despues a cuminsa yora. E mucha a bay conta su ruman muhe grandi con el a wordo molestia pe pastoor. Despues e mucha a bay conta su mama.

NO POR USA DECLARACION DI MAMA COMO PRUEBA

E abogado ta haya cu e ta duda den e declaracion di e mama. Na opinion di mr. Lejuez, no por uza e declaracion aki como sosten pa prueba. E mama tambe a bay puntra un otro mucha si el a wordo molestia door di e pastoor. Aunke cu e mucha a

bisa no, e mama a bisa cu e tin e presentimento cu e mucha ta gaña. E ta kere cu e mucha tambe a wordo molestia pero no sa con pa expresa su mes. E abogado a bisa Hues cu muchanan ta cay facil pa presion di mayornan. E forma con e mama tabata haci pregunta tabata pone presion riba e muchanan. E mucha victima mes a declara cu e tabatin miedo pa contesta su mama su pregunta si el a wordo molestia pa e pastoor. E siman despues atrobe e mama a bolbe puntr'e y e ora ey e mucha a dicidi di papia. Na opinion di abogado, despues di insistencia di e mama, e mucha a dicidi di bisa cu e pastoor a mishi cun'e.

DUDA DEN DECLARACION DI VICTIMA

Segun e abogado, prome bi-

aha e mucha no ta bisa nada cu e pastoor lo a mustr'e su parti intimo. Ta despues, durante un otro interrogacion, e mucha a bisa esey. Na opinion di e abogado, e mucha su declaracion no tabata consistente. Ta ariba insistencia di Polis, e mucha tabata duna declaracion. Abogado, contrario na punto di bista di Fiscal, no ta haya e declaracion di e mucha confiabel y como tal no por condena e pastoor. E abogado tambe a señala cu e mama tambe a bisa cu e pastoor a mishi cun'e cu azeta pa supuestamente kita spiridonan malo. E ta haya cu ta e mama ta buscando tur manera pa perhudica e pastoor.

Hues, despues di a scucha reaccion di Fiscal y reaccion di mr. Lejuez, a cera tratamento di e caso y a bisa cu e lo bay studia e caso y 30 Januari pa 8.15 lo tin sentencia. □

E sospechoso ta para riba cu e no a haci nada

Castigo combina existi pa pastoor sospecha di a haci actonan immoral cu mucha muhe di 11 año

ORANJESTAD – Ayera mainta pa oranan largo a trata e caso penal cu Ministerio Publico a cuminsa contra un pastoor. Mirando e interes cu ta reina den e caso aki, Bon Dia Aruba ta publica e caso cu e exigencia di Fiscal hunto y e defensa di e sospechoso separa. Di e forma aki nos lectornan tin un miho bista riba e caso y por saca su mesun conclusion.

ACTONAN IMMORAL CU MUCHA

E pastoor ta di San Nicolas y e ta wordo acusa cu na Juni 2011, el a mishi cu mucha muhe di 11 año. Fiscal a bisa cu ta acusa e pastoor di a mishi cu e mucha su pechonan y su parti intimo.

Ta asina cu den sala di Corte tabata presente e mucha y su mama. Hues a muestra cu segun e relato oficial di Polis, e mama di e victima a haci denuncia. E mama a declara na Polis cu e mucha a bay tuma les di piano cerca e pastoor na su cas. Nan ta forma parti di e misa na cual e pastoor ta predica. Hues a muestra cu e mucha, kende actualmente tin 14 año, a declara cu e sospechoso a habri su carson y a bah'e. E

mucha a bisa cu e pastoor a haci mesun cos cu un otro mucha. Segun e mucha 3 biaha esaki a sosode na cas di e pastoor. E mucha a bisa cu e pastoor a bis'e cu e por conta tur cos na su mama. E pastoor na Polis a desmenti tur loke e mucha a bisa. Den Corte el a desmenti categoricamente. Hues a bisa cu e pastoor a declara cu el a haci hopi cos pa e familia. Hues a muestra tambe cu e otro mucha, cu e victima a menciona, a wordo interroga y el a bisa cu ningun momento e pastoor a mishi cun'e.

Hues a puntra e pastoor pakico e mucha ta declara asina contra dje. E pastoor a bisa cu e no sa kico ta pasando. E pastoor a bisa Hues cu e ta kere cu ta e mama no ta contento cu a coregi e mucha pa cu su comportacion.

Hues a remarca cu e mucha a declara den detaye con tur cos a sosode. E mucha a bisa cu e pastoor a bis'e pa sinta riba su scochi y cu e pastoor a bis'e cu e ta sinti hopi cariño pe y a pasa man riba su pechonan. E ora ey e mucha a lanta bay sinta riba un stoel. E pastoor a lanta bay den camber y a yam'e pa bay den camber

cerca dje. E mucha a declara cu e no tabata kier pero e pastoor a bay tene na su man y bay cun'e den camber. Den camber e pastoor a kita e mucha su blusa y mishi cu su pechonan y e pastoor a saca su parti intimo pe mucha. Hues a puntra e pastoor kico e ta pensa con e mucha ta conta tur cos detaya asina.

E pastoor a bisa Hues, cu e ta lamenta cu e mucha ta papia cosnan cu no ta berdad. El a bisa cu e nunca lo bay haci algo asina cu un mucha. Segun e pastoor nunca e ta su so cu muchanan muhe den cas. Semper e kier pa tin un dama adulto pasobra e no por acepta cu tipo di cosnan asina ta wordo bisa di dje.

Ariba preguntanan haci di Hues e pastoor a admiti cu e mucha tabata un rato su so cun'e den e cas.

Fiscal a haci e pastoor un serie di preguntanan encunto e suceso. Por a constata cu ora cu Fiscal tabata haci e preguntanan, e mucha tabata yora. E pastoor a splica cu durante siman y fin di siman e tabata duna les. E pastoor a splica cu su señora tabata busca e mucha pa bay tuma les cerca dje. Hues a muestra

cu entre 20 y 24 Juni 2011, segun ruman di e victima, tur dia e pastoor tabata puntra pa e victima. Segun e ruman e victima a bay diferente dia den e siman ey. E pastoor a bisa cu esey no ta berdad. El a splica Fiscal cu e tin un schedule cu e mester tene su mes na dje. E ta bishita casnan di anciano, hospital, busca su yiu na school.

Fiscal a bisa Hues cu e mama di e victima a declara cu 25 Juni 2011 e pastoor a bay busca e mucha. E pastoor ta desmenti esey. E mama a declara cu e pastoor a yam'e mientras cu e mucha tabata cerca pastoor.

Segun e mama, pastoor a bis'e cu e tin bon noticia pe esta cu e mucha a lag'e mishi na su pechonan y cu e mucha a keda trankil.

Fiscal a remarca cu awor pastoor ta pretende cu tanto e mama, e ruman muher grandi y e victima ta gaña riba dje. Fiscal a bisa e sospechoso, cu mientras e ta haci'e pregunta e tabata mira e victima y e victima tabata yora. Fiscal a remarca cu e ta puntra su mes si e mucha ta gaña, e lo yora asina.

Pastoor a bisa Hues cu e ta

kere cu e mama di e mucha y e mucha tabatin den un situacion fastioso y door cu a cuminsa coregi e mucha, nan a bin cu e cosnan aki contra dje. El a bisa cu e y su señora a haci trabounan pa yuda cu e yiu muhe grandi a bolbe cas y bay school bek. El a splica cu el a yuda paga gastonan di school y drecha cosnan na cas di e mucha pa asina e familia por tin un miho bida. E pastoor a bisa Hues cu e caso aki a caus'e hopi dolor. El a bisa cu e ta un hende respeta den comunidad y esaki ta dañá su bon imagen. El a expresa cu e ta preocupa cu den futuro con nan lo bay atende cu situacionnan asina. E kier sa con lo bay para cu e tempo cu e tabata cera. E ta preocupa cu e personanan aki, na kendenan el a dedica asina tanto atencion, tur cos a bay perdi y awor nan ta bayendo otro misa.

Hues a puntra e mucha y su mama si nan kier haci demanda di daño. Nan a bisa cu nan no kier haci demanda di daño.

Continuacion pagina A10